



~ 16
2801
6



門八 18
2801
6

范文忠公初集卷之十一

范文忠公初集卷之十一

詩

養水齋原本

養水齋原本

門人楊萃

愚甥王孫錫

不肖男毓秀授梓

聞鶴草

偶過王君繩山庄聞其庭中鶴唳

不因聽鶴出無意得相聞水際偏能遠風中迥自分立應依
瘦石志想在高雲便欲尋聲入名香坐對焚

范文忠公初集

卷之十一詩

思二堂

昭十九年
十一月六日
未

齋中

素嫌多事是尊生但得心閒近道情韻取疎梅寒可耐形摹
瘦鶴病逾清掃花欲便觀苔坐刪竹常防礙月行片石頽然
無位置任同老懶畏經營

山園將闕澹得一泉甚甘

何須他選勝隨意得佳泉石氣如將雨花畦漸及田烹茶澆
苦月繪雪借寒煙時與松濤并聽秋坐檻前

贈米仲詔

石氣將人養煙霞舉體生何須除綬冕自不礙孤清勝跡矜
遊具公開付冶情微嫌粘帶處画品並詩名

仲春三日同孫公燦李仲昌王彦升袁慎修康用舟王

德啟遊適園晚歸

花時不必有花開但得乘春便上臺略徬江鄉環曲水欣逢
勝日絕纖埃爽生夕氣雲侵坐韻雜風聲鳥勸杯踏柳人歸
妍在影漸看斜月下城隈

味鉉堂預衍元宵二十韻

有引

中秋之勝以月元宵則兼燈色光之撩人者此文爲最
他節令不及也盡人一生止得百年除却穉老堪足攬
結此趣者不過五六十耳而憂患病瘦陰雨薄蝕常又
半之其得開口歡笑與月色燈光兩相酬對蓋亦無幾
矣余妄擬自四月至九月皆作中秋曲臺空林長橋短
舫以待月自十月至三月皆作元宵坐煖閣華堂諦理
燈事一切桃艷荷香梅芳菊秀雪風水竹都借爲此中
妝綴昔人云一日當兩日活百歲便是二百歲若此歲

歲推行何嘗幾百十道所謂能轉時而不爲時轉者也
月必會會必詩至之者余與仁常而往來無常客經始
則甲子仲冬望前一夕也

何須元夕至月好便張燈節令人能衍心閒興可乘留清刪
火樹懸照暎壺冰時趣先齋夜人招有髮僧小卮明綠玉軟
禱拂青綾釀雪宵微暖凝寒焰自澄水沉清霧散墨暈爛霞
蒸梅厭探春使松邀耐久朋形忘呼爾汝語次戒除陞觴政
科條減歡場伎倆增歌先神靜妙鼓盡氣憑陵宗案疑難掃

詆言笑莫勝吟叅東越唾儂借北吳稱茗戰分高下騷壇嘆

廢興調排名士簡端坐酒人矜抱杞憂天墜呼嵩祝日升

是日

聖節醒多聊間睡遜苦更嫌兢後約需花放臨高帶雪登事皆

離舊譜詩并就新繩佳集無嫌數中秋定可仍

聽李山人彈琴

無言先有韻竹下坐彈琴忽爾清煩想淵然思正襟聽泉來

石上引露就桐陰曲罷還凝續空林對語禽

秋夕借仁常汎舟慧上人適至同飲候月

秋遊宜淨侶忽漫却逢僧韻則人堪畫言滄齒漱冰月共從

水起酒力仗茶勝懶醉通禪意學叅轉葛藤

秋柳

葉落何如弱絮顛總來易惹是風前衰容故弄新黃色誤作

春條一樣憐

七月十六日夜邀仁常暨諸子看月語次預衍中秋故

未及之

雨自今朝霽月仍昨日圓邀朋看怪石味酒想名泉歡極能

忘病醉來亦類禪中秋輸此賞荷露正娟娟

歸

素衣生怕染京塵乞得江湖老此身無用將從榜檠伍有家
願與鷺鷥隣桃源遁去何知晉東海死寧不帝秦夜月幾迴
勞北望衝天黑氣壓青燐

有感

大啟嗣祚年海宇遘大慶朝廷欣有人臺諫氣色盛叫闈灑
赤肝指奸節逾勁危明寧不過恃有上神聖何來連斥逐無

乃累新政薄謫亦主恩敢廢天子命所冀端一開九言疑欲
屏中喘思乘墟况可受以柄於惟我神皇高拱飛天鏡稍稍
視下輕釀成結轆病今誰秉國成借之弄機宰罪人佚顯罰
乃曰言官淨漆室抱深懷能不心恹恹倘慎一怒加撫茲萬

邦正

倪玉汝太史見過 白飲瀾園月上泛舟得一先韻

匪係神交定在先匆匆那締此奇緣秋逢爽候隨開社舫載
名流便擬仙取醉猶存清者聖稱詩不避野而禪醉餘試共

商茶事覓得新方好洗泉

昏黃月暈蔚藍天高柳垂堤緩放船將我入雲雉冷語如君
對酒總枯禪和歌蛩韻商為調依水荷香晚倍妍不問知當
游濟上筆濤滴瀝響寒泉

王汝時有
歷下之役

秋雨送琴客

推琴還徒倚似欲問歸舟裝就藏雲滿行先借雨留分題當
贈柳惜別正悲秋一片瀟湘意途間按譜收

病來八越月矣起而口占

似經月度幾迴圓病鶴相看共黯然少間借題仍謝客劇時
絕念擬逃禪累心未盡留詩債檢篋還羞問酒錢小醉猶思
驕健骨時扶瘦影立花前

紅樹

作意看紅葉遊時定趁秋經霜初就染映水益能幽艷護藏
風樹光寒載月舟隔籬黃白隊爛熳莫相讎

病起聽歌坐中約以茶賞適仁常寄詩相訊即用其韻

成詠

耽病因詩總是魔破除獨借幾迴歌醉聽易惹閒思緒茶韻
銷來試若何

每至關情喚奈何茶顛較酒不爭多曼聲怕到銷魂處
從將換艷歌

憶山

憶山偶得句多半是言秋煙濕林光醉涼生竹韻幽招雲時
掃石見月或登樓准擬寒梅綻還成度雪遊

秋後一日同毛伯仁常集瀾園澄碧堂

石坐何來濠濮想蕭篔簹布置意蕭騷秋生一夜寒初透月照
三人影未勞展卷吹波翻石浪聽茶沸雪攪松濤相看已覺
成鉉對總雜歌呼亦自豪

對酒示未央未央不飲故與之窮酒理也坐中時有琴
客

茗佐歡塲趣未神酒除色味有天真此間亦欲鉉心理深解
還商不飲人

酒品堪同琴品定生嗔坐客漫言佳煩君試奏無絃引取韻

移過石水涯

爲園

野性所耽置一丘爲園得水又何求
衣裁薜荔將終隱手種兼葭爲聽秋
花下彈琴驚鳥睡松陰落子助棋幽
前林妝點教如畫趁月明時好上樓

未央仲昌坐餐水齋

何須雅事費商評入坐名流意自清
秀色侵眉秋水湛墨光觸手古香生
塵言冷處鋒偏雋茗飲酣時釀欲傾
可怪移寒

辭就暖此君亦作世人情

時移庭竹齋中

禮佛

坐對寒冰冷熱賜試將消息問空王
翻經手浣薔薇露禮佛心澄菡萏香
累少全家修淨土悟來立地得慈航
安禪容易難持戒時向花前覓酒方

留未央仲昌小飲看銅雀瓦研

每當苛禮似相讎小聚寧嫌草草留
病遣有方先破悶趣多無處不關愁
酒花浮玉腸生雪茶韻吹蘭氣帶秋
一片英雄

身後瓦摩筆淚共墨光流

客有詢近狀者書此以答

若問歸來事閒時手一編饑臨乞米帖貧乏買山錢鶴性如
人傲花枝近水妍猶容具客至語帶五湖煙

對雪

月下宜修篁風前宜新柳雨清誰相宜梅以雪爲友孤山移
數株鐵幹矜希有無雪少精神如人失勝偶情深與奈何枯
坐相待久天似殊作解吹霰灑疎牖傲古繪雪堂細於影中

取明滅幻冷光徃徃困盡手就旁寫凍枝以配支離叟徹骨
耐高寒雖老不嫌醜鉉賞愜素心宜茶不宜酒

病起對酒示未央仲昌

准擬歡場病稍寬當筵緒亂轉多端國憂無力仍謀野生計
全窮早厭官烈士神鋒何太雋清人腸胃幾曾寒誰能遣此
銷惟酒可奈茫茫取醉難

冬至留未央諸君小飲余時有以友之痛未央亦以客
思歸故未及之

病餘節序幾相忘坐到情生漫舉觴雖在醒中開醉趣每臨
歡處動愁腸憂天自覺心逾短測影誰知日漸長夢苦勞人
常畏睡不分感舊與思鄉

味鉉堂

留將何物件鉉亭瘦鶴聊存隱士形傲骨相看延石丈閒功
好與註茶經蒔花亦欲成經濟餌木兼能益性靈道是臥遊
嫌多事從教飾壁壽空青

與未央坐古香齋鑿諸供具

鉉賞無關好事家嚴中取鑑意微奢摩挲明玉靈人氣指點
微斑辨土花水寫湘函晴作雨香凝芸架夜生霞難消兩腋
清風甚又煮寒泉點碧芽

魏武疑塚

銅雀臺已荒英風起超忽西陵秋草外高墳立突兀土非
無情千載難銷歇遺香散空原行人步明月虛塚七十二木
埋英雄骨魂遊夜歸來自疑無處歿四日兩口人分身臥靈
窟何不壘壘間通題漢相碣

留未央未央家有湘君閣時寓大乘寺閱月

暫除名理覓新聞細剖生香坐對焚語授仙人還破戒嗜偏
古物更深文禪棲倦臥何妨懶茗飲清醑亦類醺待雪中聞
情可耐無勞遣夢到湘君

仲冬晦日仁常送迎春花至卽邀共賞

夕照流窗映薄紗披風竹影妙歌斜當寒故暖將爲雪未臘
迎春早放花雅節和譚敲響玉清供佐酒剪芹茅坐拈宗案
重重掃耳用聞香鼻味茶

郭伏生至同諸友集味鉉堂得詩字

誰聯舊契與新知勝友如雲湊一時艷事翻來擲入弄方言
譜去足成詩人饒高韻琴難並酒具別腸醒亦宜無計相留
泉可戀水嬉好待月明期

花朝前一夕同方孩未澄碧堂觀劇

年華簇月一週新舞艷歌妍媚好春繡綬現身爲浪子紅妝
飛夢翺僂人情多每至傷哀樂劇換相將問假真香再重添
燈再易清宵坐盡到花辰

瀾園雨雪

恰值遊時雨空郊遠意寒煙低肥石貌濕重醉花痕迷樹雲
生暈衝巖水作湍南宮得意處潑墨未曾乾

聽歌

未展歌喉先自韻况兼按部換新聲過腔作意低低度點拍
須教漸漸輕將到停時眸忽送偶當誤處趣翻生座中顛倒
移醒醉幾度呼來問小名

阮集之枉訪卽別以詩見惠用來韻答贈

梨雲釀雨漲春瀾驛路花明作畫看乍把眉間橫紫氣還披

篋裏有晴巒芬流齒頰言皆韻意醉醇醪量自寬別後相思

何可耐持詩日對碧珣玕

集之著存
名山記

看演黃梁傳奇有賦

閒愁易織鏡中絲歌舞樓頭度景遲了道無關聊作戲邯鄲
睡醒已多時

管絃演就步虛聲爛醉花前大藥成狼喝何須敲枕破夢中
有訣學長生

蓬萊剛到早收場却是游仙好自忙
諸趣回頭還歷歷醒時那似夢時長

剷頭有相總非真影現三山幻劫塵
莫弄精魂鸞鶴舞神仙猶是夢中人

錢受之見寄探梅之作此奉答

攜將梅韻付詩篇想像清游已自倦
影向月中摹瘦骨意從花外悟空禪
朗吟風定香飛案曉坐支窻雪滿天
灑酒江雲酬對罷羅浮移夢到君邊

瞿少潛見過留之味鉉堂有作

爐霞片片染衣裳拂塵手提坐隱囊
似記前身工作畫懸知去後坐留香
杯生淺笑花浮面曲度深宵月過廊
我亦一丘耽夙癖入林雅事細商量

程肖莪惠菊

東籬分得幾叢花暎綴秋容爛若霞
淺月枝移閒取影斜陽坐對靜嘗茶
省將掛畫香仍勝饑欲餐英韻似賒
應景無人能送酒清寒猶自過陶家

臘日郭伏生來自敬仲所留飲味鉉堂同王貞伯
思對梅花發重來得友聲人如羹鼎貴語帶水山清酒轉泉
逾澹燈因雪倍明聽歌懸別賞微處想詩情

漫興

槿籬逕曲幾迴穿屋厰軒窓別一天供石全臨倪畫法澆花
亦取惠山泉香薰紅袖安禪榻月引緇僧上酒船清事將無
成溺惑因空俗韻便名僂

留都稿

中秋無月

非貪明月好不願值中秋移就燈前照思從鏡底收雲香花
唾影波散雨吹愁懷此清如挹還堪作夢遊

壽陳眉公徵君用董鉉宰韻

無論蒲駕與鸞驂懶出僊廬歲已三避詔洞今移泖澱老人
星獨炤東南露花歷歷飛毫彩霜菊纍纍翻手談何日解屐
求辟穀道衣相訪拂烟嵐

恭閱陪京宮闕次王元美韻

帝闕昔經始匠作亦云備淮甸擁那居鍾嶽奠宸位虎踞八
表從翬飛百禩寄宮水紅壁流花花綠堦麗結佩趨辰朝鳴
鐘候更次車書旣已同齋居順星氣儉德神禹同卑宮符規
制輦路長松風香隨秋月至

恭謁孝陵有述

惟帝造家邦棲神依江甸本計繫東南基立聯寓縣牖戶奠
子侮咽疾席清晏攀髯泣難從藏鼎垂鍾獻光氣照松楸萬
年紫氣現絳帷頓八紘除克與定變會朝旣清明長發真龍
見南顧思無數濯靈此永奠臣職愧軍旅敢從俎豆薦

闕江

長江浪湧石頭高維矣王師壯羽旄關外無人爲掃幕軍中
何計可投醪乘風貔虎堪摧陣落日蛟龍欲撼濤擊楫中流
思百折宵衣鐘漏正焦勞

祝太蒙尚璽宗兄時爲閏四月

春流餘閏雨花明介壽長延夏氣清水木自具天衍派璽書
專尚月爲卿同人應語偕憂樂獨往寧堪滯釣耕聊選江山

思仁堂
湖文思公詩集
娛此日白門楊柳正藏鶯

秦淮

三月秦淮上新鶯代管絃柳春全拂水花夜欲藏煙陰霽駐
雙掛淋漓酒一天風流餘此地莫認永和前

壽周挹齋相國五袞時爲仲冬

綺歲功成帝者師浣花溪畔隱仙姿正餘日月懸青嶂猶有
雲雷繞赤墀爐煖傳山藏舊賜梅含霜圃長新枝佇看紫詔
蟠龍臥泰際陽回正此時

四友齋齋宿

老松翠栢綠陰古時聞暗香隱梅塢新篁迎雨嘯碧雲夢入
山陰千尺頰杜梁乳燕驚蟾蜍螢星飛盡墻陰舞穆然靜慮
休空寮百王禮樂循簋簠咫尺聲靈鎮舊邦遙望闕宮思桑
杜干雲勁節洵良朋好手調羹爲漑畚我戰則克祭受福庶
以恪恭報明王

靈谷寺

小隊衝寒路不喧長松影落給孤園風傳十里旃檀氣負郭

千家古雪村靈月自生空谷底暗泉環漱半山根到來未敢
窮遊日時亟方嚴鎖鑰門

黃公讓垣長以言事去國

龍門正氣接天都抗疏高名壯伏蒲獨以時危鳴仗馬不因
秋老憶尊鱸清朝終是霜霆重幽夢還將日月扶世事正須
同擊楫競傳江左有夔吾

壽許子洽

寥天孤鶴翥雲翎高士于今見典刑字飽神仙靈蠹簡書藏
石室續麟經董狐筆不寬時貴司馬名先動漢庭陵谷幾更
君未老老人星傍少微星

暇辨亭落成

雄都開白下重鎮寄師中天作高山仰地環二水通鐵花昭
舊服金匱襲遺弓機務分宸北綢繆控大東裘輕思宴鑄圖
覽識詒豐六代風流地千秋日月宮但存高士意期與昔賢
同鎖鑰慚司馬風雲想臥龍治絲須取暇聚米快成功了此
無多事于斯竭匪躬捷書來賭墅猛士憶歌風氛靜清餉服

時平燕帝穹登臨籌豫勝月帳夢非熊

朝天宮即治城山

治盡人間世轟然存此宮廊迴斜落月鐘老咽秋風靈氣壓
壇護香煙御座通如聞山作語萬壽祝無窮

登燕子磯

天地從來峙此磯驚濤欲撼石崔巍長江自昔稱天塹一水
于今壯帝畿雲鎖蛟螭瀾自倒山蟠龍虎脉相依上流形勢
操全勝隔岸休傳羽檄飛

天界寺

塵外何從覓淨緣偶來法界叩諸天經聲度水魚能聽樹影
叅雲鳥自翩地靜寶花香作雨陰多松月夜爲煙慵將餘慧
需牙後半偈還期四大捐

賀京兆王鉉珠擢廷尉

南國棠陰借保釐功成雷雨慰繁黎憂時未肯忘桑梓治內
尤須問棟榱泣罪湯仁寬一面許荆呂傳重三推臨岐別有
縈愁緒欲誦嵩山補袞詩

賀李含真晉司農

鳳詔新傳自九天秋深花共綺雲妍繭絲憂切監門繪箬借
風清紫塞爐萬井恩波霖雨潤四朝元老地卿賢冰厨釀得
芙蓉露重輓行駒醉別筵

登雨花臺作時偶聞警

香臺環舊刹踏翠上逶迤煙草六朝意春風三月時城規開
甸服江線劃天維極目煙塵起臨高漫賦詩

莫愁湖

莫愁湖上酒樓前露荻煙葭間渚蓮一代風流披錦夜四時
芳氣蔚藍天

半歌山碧帶秋波柳岸樓臺掩暎多水鳥相呼飛不遠慣聽
人唱石城歌

鷄鳴山

壁削高城寺帶山雲寮丹舍見漁蠻波光照映湖爲鏡樹色
青歸霧作鬢諸象疑從空際幻一官忽覺去時閒殘陽未下
東生月無盡光中自往還

壽官疑之母宋恭人七十

幾許明膏聽聖伊代嚴成教兩名齊鷄鳴每肅星壇禮布素
恒兼象服携脫髭真稱名士母長齋不愧太常妻楚烟綠處
春風起吹放桃花遍五溪

送唐損占祠部出守歸德

夏寒江漲水平天花映朱旂草色鮮舟楫濟時新五兩威儀
行部舊三千兵銷渤海人驅犢雲吐中嵩地湧蓮露冕懸知
澤自溥隨行霖雨遍周田

題翁漢生園

震澤湖中第一山山中別有一人間園開透水峯峯出花斷
成蹊樹樹灣海氣生煙樓閣廠書燈徹夜酒盃閒還聞光祿
神仙去不待千年化鶴還

題陳幼白石浪閣

蜃波吹不爛碧浪結幽紋相對無一事秋濤時可聞
遵海忽南來潮浪接紫荇入夜裏寒光虛窳瀝素影
枕流與漱石共此靜觀中高閣貯雲氣將無性所同

不學乘桴遊却為鞭石計憑虛招米顛花浪霽清袂

贈三昧禪師

道是宗風盛戒居定慧先看花飛作雨聚石擊無煙堂上三
車法燈前一指禪往來乘願力大地擁金蓮

秋杪日招諸文集靜遠堂分得門字時扈芷天游二

上人新至

其提高秋色茗杯遠意存巖雲來古澗繪雪艷倚門花影當
風亂歌絲入夜繁禪參清醉裡聽曲莫銷魂

壽丘太安人為楊計部母

鸞珈色映綵衣新梅悅曾隨骨鯁臣教比鯉庭勤社稷遡來
熊夢叶天人濟輿疇日花堪賞陶母官厨性愛貧見說冰心
兼露灑南天競祝北堂春

戊寅初度喜雨

冬煥知將雨應期此日陰春先梅意潤爽入酒盃深滴瀝寒
歌韻雲雷傲壯心感時才易盡漫自說為霖

落梅將殘有作

花事亦何與人事不禁開落自關情雪中欲盡寒梅影留取
殘枝待月明

賀李少文

鳳毛代起重明光御筆新分豸史霜暫爾鳴珂嫺禮樂還看
叱馭問津梁舉帷日映寒花麗感事愁同雁字長尺五恩章
暉帝里應知諫草映縹囊

丹壽太蒙宗兄

狼山菁葱海雲薄真人嶽降鯤鵬壑伊昔我祖宦海陵丹穴
一枝才焯燦冰心蟬脫薄專城傳學追隨漢五更十年郎署
芬時譽起部風清水鏡明髮黠卿雲奉帝璽翩然拂衣謝青
紫卜築巖阿依白門六代風流偕臥起仙風飄渺生春姿耆
英高會浣花時幸附墳簞進醴醪觴滿好咏大椿詩

春日登雨花臺

山光一帶正迎人選勝高臺載酒茵綺席閑分鋪草坐香塵
似裊散花身晴煙破曉青堪譜淺黛插春翠可親解縛勝情
還不礙披雲雙屐試遊新

三月遊攝山作

山寺春雲護披霞入漸深
品泉移谷口選石費天心
磴轉江能近林空月不沉
無生吾欲證靈藥懶重尋

遊牛首山時方解官

看山雨後清于洗天闕
遙臨翠可分恰對峯嵐如
欲語此來猿鶴免移文
塔移影轉因迴照磴引身
輕恍入雲坐定聊參火風
義空香何處覓聲聞

高座寺

綠筠遮斷寺邊扉如寄
閒身向此歸山月每窺竹
影瘦松風忽瀉茶聲微
入來如共雲分座話久偏
憐翠上衣坐破蒲團無是
處眼前爛熳逗禪機

沮風夜泊

橈停月落暗江灘何處
吹帆夜未眠自是隨風儂
不慣乘流莫怨下來船

壽薛千仞八袞時寓白門

少微星曜謝公墩祭酒羣
推白社尊筆下六朝供帶
草眼中

四世見芳蓀朱絃愛譜清平調絲雨欣霑綺季村夜讀仙經
和鶴齋慢亭煙月接崑崙

送葛震甫歸洞庭

夏寒新漲碧澌流雨灑別筵感易秋敝篋千篇存故業孤筇
萬里侈竒遊清風滿袖無餘橐煙水當門好繫舟同是羈人
先送汝愁深忍復說離愁

祝何芝嶽相國時為嘉平月萬壽前十日

補袞功成日月間賜裘紅賦映童顏庭栽玉樹娛清晝藥採
芝田養大還九鼎猶存黃髮老一壺肯許赤松間崑陵恰

嵩呼候南國仍看北闕環

立秋日錢與立諸君送之廣陵影園月下聽歌次鄭超

宗韻

恰當勝地又佳時暑去人來月與期空水亭為開面目新秋
柳亦競腰肢園摹畫格形生影妙解歌情肉并絲囑語蕭蕭
翻別調登臨無事更傷離

子與方書田相國同時被放舟次維揚飲文昌閣

艷說聽濤正及秋煙波一帶望中收鶯花逗夢生閑恨烽燧
關情蕩遠愁去國何妨聊問酒思鄉無奈只登樓閑身并荷
明王賜避世相將訪十洲

巳卯九月杪再遊攝山遇雨

筍輿經雨倍逡巡虛想秋遊勝似春却對煙雲如畫裡入山
仍作臥遊人

與一門上人白雲庵共話即用其韻

關心與山意秋際更相關因雨增蕭颯有僧潛往還雲留翻
磬寂鳥過總歸閑揮塵通頑石無言并可刪

白門重晤劉蓬鉉相國舟中共話

霜深黃葉滿秋山相對江頭各解顏四海無家經亂後一身
盡瘁憶行間法明始欲求踈網王悟何難立賜環去國孤忠
懸九廟金籐啟處絳車還

歸舟暫泊京口

空航亦號五湖遊勝地真堪與唱酬唯許卜隣招隱地三山
雖好懶淹留

登焦山
一棹凌波陟翠巔，潮生几席恍疑仙。山青忽斷雲沉寺，月白
遙連水際烟。壑鶴空聞銘石壁，盟鷗應許話江天。洞稱避詔
今猶指，道是逃名却更傳。

遊金山寺

萬頃波中獨占天，客帆日夕望蒼烟。過江車馬勞塵劫，繞寺
魚龍穩晝眠。僧喜抄詩添墨榻，佛來香國記桑田。一拳已自
涵空相，何必安心問了然。

賀茅止生舉第三子

有家才妙誕慈明，蹀躞雲駒類所生。舊業留存銅雀硯，賜袍
剪作鐵花綳。已知瑞國徵三索，但祝成人享太平。河朔恰逢
消夏會，歡傾百斗故人情。

庚辰閏元且作

天心重起貞元會，月紀春王序不窮。爆竹無聲融曉日，冰花
盡泮漾條風。夜忘守歲新人意，瑞丹占雲費化工。最喜太平
頻獻壽，椒觴又進未央宮。

閨來猶自喚元宵燈事重重意亦驕影燦星華梅盡綻烟清
火樹雪全消傳柑盞更温前月踏柳遊還憶昨朝天似多情
人并韻春深恰好試輕綃

閨元宵作

閨元夕同茅止生諸友雨中聽歌座間偶談長生之旨
客有以占候家爲是月不宜閨者故并及之

常期計已過花朝因閨稱元再此宵燈焰明因離月暈歌情
妙不借笙簫駐顏酒當三千核取景人疑廿四橋贏得百年
剛一遇憂天無事問層霄

同方孩未王子雲及支浮諸上人華山月下共談

叅禪何處問宗風欲斷聲聞棒喝窮香散空塔花自寂誰留
影印月明中

壽南少司農畢東郊老師

法星曉燦映長庚鍾阜遙看五色明周召大猷勦武烈東南
元氣華陪京泉流九府心能計天柱四維手可擎歌罷岡陵
還進酒緱山恍聽夜吹笙

題周江左鼎足齋齋中所貯書畫古法物

結廬人外意蕭然香國翻成小有天四壁忽生空翠濕千秋
如見墨痕鮮摩娑金石人俱古寢處縹緲夢亦仙其我手中
成鼎足坐來誰羨米家船

送盧德水漕使于京口

奕奕丰稜即適雲澄清頌更滿江濱霜飛銅墨駭堪避疏繪
流亡草莫焚齊魯名咸宗泰岱東南士盡仰河汾明朝楊子
仙帆渡遙向三山挹紫芬

立秋前四日同諸子秦淮夜汎計二十年再續此遊感

慨係之分得霜字

桃葉芳游夢未忘廿年迴首嘆流光秋將啟侯月先好花與
為隣蘋自香溪漲聲如聽雪瀑詩成字欲挾風霜鷗盟長訂
秦淮水一棹漁簑岸柳傍

送王子雲歸楚

人道愁時我亦愁秋風江上送行舟孤高懶上春明賦慷慨
能抒國士籌蓬底正堪題雁字酒家到處典鸚裘欲過湘水

懷明月應憶秦淮古渡頭

途中見紅葉用少章韻

曲曲寒塘點綠蘋
霜林遠映倍精神
炤來光影宜朝日
別已經年見故人
黃菊爲隣依晚徑
青松獨許作芳隣
游人好拭看花眼
冷豔秋容自不貧

送太蒙宗兄還海陵

臨期執手意躊躇
秋老還歸海上居
桃葉寒烟留拄杖
白狼翠色點衣裾
餐英正及尋三徑
揮麈相將伴六如
我亦倦遊

思避地下隣踪跡
溷樵漁

贈朝宗上人

心棲空不任意色
更軒軒白鶴雲間出
青獅座底翻談
冷龍耳聽定起石頭言
豎拂開諸義
天花夜雨繁

寄懷倪玉汝太史

西湖感舊夢中過
橋畔秋容近若何
携奕山頭皆謝墅
扣舷月下譜吳歌
星纏太史藏書麗
潮咏錢塘得氣多
可憶白門孤嘯者
江風蕭瑟嘆庭柯

贈鉉冲晉少司寇

帝德好生意已宣
臯陶新簡衆欣傳
白門雨潤膏滋黍
園土春生火長蓮
直佛心慈能度世
仁人力大可回天
覆盆行望朝暾色
矯首卿雲在日邊

送方爾止傳經蔡兵憲幕中并司記室

柳澹風柔草色欣
春江帆影映斜曛
從戎白昔推才子
辦賊于今屬使君
劍氣宵寒星斗動
書聲曉並鼓笳聞
聖朝頓網旁求切
奏捷先看露布文

春日同雪嶠上人遊瓦官寺

廿載流光嘆擲梭
乘春無意復相過
清陰不改留孫竹
老樹曾經挂女蘿
劫歷剎隨陵谷易
境幽香雜雨烟和
坐來試證無言諦
止水何須問定波

送汰如返吳門

高座談經響法鐘
又看拂塵問吳葑
懶殘煨芋迎寒月
古德歸藤伴老松
弟子教成香作雨
維摩健去舌無鋒
楓林已訂重相訪
花路禪關莫便封

送杜開之都督鎮浙

漢庭秉鉞重嫖姚上將輕裘不擁貂
鈴閣已清南國紀雕弓欲射浙江潮
樓船雪霽飛雙纜健馬烟寒駐六橋
遙憶旌麾移鎮日西冷月照鐵花袍

送雪藏上人將還匡廬

未識匡山面逢師似已經雲巒
光在眼筆墨性能靈言下三乘法圖中
五岳形倦遊何處去風雨路真真

送李少文按閩

霜花肅氣秋九月紅如茜送子馳青驄
丹山水飛練頻行重握手憂時心悄悄
烽煙震我園籬絲悲赤縣誰爲輕東南
濟川藉手援海邦幸無塵時恐妖氛見
水鏡澄官方繡斧彰雷電封事策金城
攬轡巡夏甸庶以荅焦勞入對含章殿
慎旃似爾祖崇勲懋帝眷

秋杪登安隱寺後山小飲適余築精舍額曰萍菴因以萍字限韻

節過重陽秋易老霜花著樹暎山青
妙高臺望人皆蟻雲物

波流室似萍，遐夢聊分僧榻臥。徵詩借作梵音聽，情多易感誰能醉。莫怪三閭嘆獨醒。

壽錢牧齋宗伯

鴻禧天留碩果身，平章三徑裕經綸。名尊師表門仍廣，身待時清道可伸。帝夢築巖思舊履，臣心補袞感蕭晨。海虞暨整東山奕，莫向秋江問采蓴。

水霜歷盡歲寒心，鉉鬢依然雪未侵。甘谷花香堪煉鼎，尚湖潮長可飛霖。匡時大業春秋富，砥柱狂流日月深。羣望調元需妙手，雲開指顧掃沉陰。

春日遊俞仲茅爰園

夙約今方踐，期春故爾遲。石猶存雪貌，柳漸返烟姿。鳥嫩聲能和，竹多徑易疑。韻留歌盡處，酒半出新詩。

樂事應非一，清宵好放船。窗開綠月上，岸泊定花前。穿谷工疑鬼，迴溪別有天。爲歡愁漏短，明日隔風烟。

送周挹齋相君再召

絳車花擁草烟和，海宇風傳盡舞歌。輔弼星明銷宇弗，岱宗

雲出灌江河功銘鼎籙書今續玉稱身腰髮未饜從此杞人
無過計補天曉看五雲多

雪嶠禪師見過留坐將還徑山詩以留之

秋原霜色懶招尋鶴引高流入徑深茶醉酒醒難判斷身真
世假任浮沉叅禪并入刪鉉語聽曲翻能長道心行脚無須
商去住心空何處不雲林

壽王季重石夫人六十壽

林下風高女士行名人絕代影相將篋餘布素隨仙吏夢發
蘭闥育國香鳳翥雲中風正飽花明雪後日初長齊眉笑對
佳山水歲歲綠衣進紫觴

張九山給諫言事被謫

丹翰戾南國矢音躍竒姿梧掖肅秋霜秉節陳危詞狐鼠已
魄阻憑城安所施天意神顛倒吾道無詭隨瞻彼高巖噫何
妨暫枳棲君子司邦直卑飛亦光儀中誠苟不昧剖衷對龍
墀嗟余抱孤憤慷慨共心期

壽方孩末年丈

秋花寄靜枝幽妍入蓉帳霜氣肅萬物孤松發條暢君子古
 處心堅于九節杖狂流任推遷未俗懷嘉尚吾道賴玉盟騷
 壇亦宗匠略寄安石基量傾次道釀相看雙髮鉉閑情悟昭
 曠冰雪神仙姿湘波瀉清漾藥圃菊苗肥楓林紅葉颺何處
 託遠心古衲互酬唱黃梁夢蚤醒百事任層浪

送成寶慈侍御言事被逮

景運麗中霄階扉翳重霧大道忽淪彘疏稗茂嘉圃抱葉秋
 風寒獨鶴揚清唳昌言排九關口誅振未步未憂天聽高恐
 為先聖懼倫彘既大明生死何足顧賜德正方亨豐蔀莫能
 錮風雷感帝心昂首驥皇路君子勗敬身同心要主悟莫言
 虎嚙人相戒公無渡

去國辭陵忽大風雷

曉望鍾陵紫氣開五年拱護愧非才狂愚有罪臣應死高厚
 無私怒易回帝鑑自能明日月孤臣敢詫動風雷去天淚灑
 重回首何日妖氛靖九垓

聞黃幼鉉釋繫志喜

范文忠公初集
思仁堂
雪霽春風遍草萊
纍臣釋繫日邊來
堯仁又見三言宥
湯網
今看一面開廟社
有靈深呵護聖神
獨鑑自昭回
太平應卜
天心轉海宇
歡聲動若雷

壽姜漢洲封君六十雙壽

夜讀靈文曉弄潮
齊眉白髮未飄蕭
古心映物存三代
佳致移居愛六朝
世望門高東海表
國材梓象北山橋
長春酒進還難老
蓬島仙人近可招

煙霞載爲錢與立題

灑氣蕩空明
一棹如浮梗
竒當無窮豁
迦洄人外境
夢出水雲間
風雨皆霽影
扣舷者誰子
臥遊悟閑靜
不載石與書
恐爲空明屏
日月吹逝波
縱心以相領
拾得片片霞
澄懷對三景

涂德公疏救黃又鉉廷杖尋奉詔釋于其歸也作此以贈

未回天怒雪霜紛
灑血陳詞斗帝閭
任蕙久能容汲黯
免冠故敢揀朱雲
風傳大學藩
猶立名動宸旒
草莫焚盛代
卽今

寬黨禁好將厨俊報明君

會聞逢比犯嬰鱗今日天留不死身鳳噦欣看來草野寒疆
足可愧簪紳千秋義激閔師友五夜銘心泣鬼神持此孤忠
知不變登朝只願作良臣

贈黃止子宮詹又鉉猶子宮詹被建時止子隨之至都

周旋其難詔釋同歸作此送之

淑景曜靈晨習習燭谷風陽和回大地柘荻發昭融君子秉
危節蹇蹇矢匪躬快視風雷感不待啟金籐憶初當未霽轟
擊震高空見開皆避匿踟躕恨莫容阿咸文弱士氣乃燭長
虹帶衣效橐籥生死等毛鷗一掬悱惻意誠至自感迴整轡
回巾車何用嘆不逢皇路向清蕤穆穆達四聰拔茅符泰象
歷陞俊義同屈伸有定理從來若張弓去去勿復疑吾道無
終窮

送楊伯祥就逮入都

黨人碑石聞已碎何復驅車泣草萊鶴禁還須資頗牧鑿坡
豈忍棄鄒枚昭回日月懸清炤顛倒風霜老幹才此去應逢

宣室召秦蕪吾道待君來

甲申殉難絕筆

孤臣空灑淚天步遂如斯妖蝕三光暗心盟九廟知翠華迷
草路淮水漲烟澌故國千年恨忠魂遠玉輝

晚學楊需雲

全校

甥孫王作肅

范文忠公初集卷之十一 終

簡牘 附存稿

范文忠公初集卷之十二

門人楊萃

全輯

愚甥王孫錫

不肖男毓秀授梓

簡牘

與吏部曹仲參

再啟不肖某自奉命以來律之不宿家之義即當趨裝北上
第家嚴初旋情關舞綵依依子舍弗忍遽出擬欲遲至仲夏

不知可否謹以請之台臺

簡鹿乾嶽

一寄書問忽忽半載餘矣爾時幽憂沉病猶能強起見客數月以來彌致削損漸成不起之症雖復裹藥爲飯日四五劑而刀圭不靈支離如故總緣哀劇傷心一遇感觸輒嘔血不止病在本源非藥石所能奏效耳前仁兄曾苦口勸我切切引身經之痛爲誠心知相愛之深而悲從中來不能自遏每念古人滅性比於不孝亦心知之而一時難已今追悔無及也然伏塊之餘未忘憂天當揆何人國事能堪敗壞耶憶已已我輩在長安議起高陽公爲旋乾轉坤作用今舍此老未克有濟曾詢同人漸漸得此機括仁兄閉中幸一勸駕可爲蒼生出乎

與李性叅

日者得書情至可掬也癡人徹淡于時事未能放懷家居深僻如坐甕中寧不悶絕茲特遣价遇有緊要卽令馳來相聞如敝門人孫興公者亦可以聞見助也

與友

豐芑舊都鼎借斗山偉望乃主持清議表正官儀中外皆仰
 丰采焉今者績奏彤庭行當揆留轍座二十四考其始基之
 矣聞以便道錦耀里門遠近傳為盛事某睽違日久依戀彌
 深即欲趨申賀悃并道濶悰而病體委頓不能奮飛謹此遣
 役代叩附以芹將伏惟鑒涵

復徐思健

別經半載相思為刀偶以李生之便特借作郵因訪西席故
 薦左右其實此人止可為師非為客者比弟近病體纏綿藥
 不脫口醫不離門而猶無起色神傷之餘一時固難驟愈每
 自循省殊有性命之憂今惟勉自願攝粗延殘息以守先人
 墳墓此外絕無他想日前廟堂急欲料理已作書止之揣分
 量力為櫟樗自全計非矯情好高也荷塵注之殷輒以近狀
 奉報念年翁榮問休暢遠邇謳吟運事告竣便可游優以待
 喬遷濟上地衝屬狹事簡費煩誠不可以久居耳汪孺老文
 心道氣弟所夙欽逢人說項固出中心聲氣之交奚必謀面

范文忠公初集
思仁堂
哉見時希致

與吳龍微

比來流寇縱橫幾半天下所過蹂躪靡不如意而獨不敢窺方城一步則老公祖偉畧能陰禡其魄耳秉旄而掃妖氛居鄉而護桑梓豪傑作用固當如是聞知廣招才勇以備禦侮治其得一異人特獻左右高唐金振祚乃治其理東時舊役也膂力弓馬種種絕人而機智深遠更屬難得以之効力疆場必有可觀第目擊其服役勤恪知之甚真故敢道及幸進而試之當知第言非妄

復德州劉守

不佞雖離閩鹵尚纏疾疾觸時卽灑憂天之淚辭榮毋勒絕交之書當茲秋色平分應添白髮覩此月輪已滿如覲清輝乃辱八行重之九鼎惓惓期望非所敢承疊疊注存寧宜自外登嘉頓首附謝銘心

與孫思皇

春初與令兄別後遂病至今緣哀疚之餘神傷骨瘁雖藥餌

百方未奏效也近爲寇警頻仍杞憂嫠苦緒盈襟破除無
計使來開函得諸刻讀之至德可師清風并灑肅然起敬心
有所感又悄然悲也語云惟孝友于兄弟是以爲政乃惟孝
友斯能爲政耳以門下至性凡諸設施俱以此心行之武城
寧不樂有父母乎得除書故爲并州色飛數月新猷固知喜
爲不謬三軍中枯未作一詩今乃爲兄成一律愧未能佳聊
紓中所欲言耳拜惠之餘附以一絲引意希惟莞納爲荷

與本縣王父母

河西無處不亂所隔止一衣帶水耳賊若東來旦夕便薄城
下城守何可不加意乎賊之得計大率在用內應而門禁嚴
防是今日第一義出入之間固未可聽其叢譟無辨也但數
尺土垣直須靴尖踢倒此必有兵方可恃之無恐而猝未可
得柰何日聞天津發兵數千往援鄒滕經臨境內此天假之
便也卽當便宜暫留以爲防護勦捕之用一面申詳院道此
應急鈔着不可時刻緩者惟老父母速圖之

與天津監軍道來公祖

久欽斗山兼蒙覆露旌麾將臨業已伏候道左以摠仰止私
懷前驅想當不遠耶頃聞景州城西妖賊競起搶掠村落已
以十數擁衆將攻城矣此地平曠無固可負徃一勦捕可立
撲滅若使得一城陷一邑彼反逸我反勞彼反圍我反渙彼
反爲主我反爲客卽兵多難爲力矣或攻近而及遠或舍已
而耘人此緩急安危之機間不容髮者也適方報變而老公
祖戎車南指此天亡賊而以奇功授台臺也昔新建往撫閩
軍取道吉安聞宸濠作逆急檄諸郡兵討之隨以立平成此
大功今以望之老公祖矣

又

適聞前旄已指廣川應變甚捷當機中窾足徵方畧矣此賊
蜂屯方始蟻附未多以三千鐵騎臨之何異泰山壓卵第其
營寨宜審虛實疑我而我勿信撓我而我勿亂嘗我餌我而
我勿售厚集其勢聯絡接應而擇一熟知深淺者爲之導妖
氛可立掃也九宜分一軍于桑園河上此河雖盈盈一水而
地屬扼要再遣數人一在德州一在連窩南北船隻不許徃

來以防東渡有此則東西不合其勢自孤而黨自散矣不然
乘間思動在在有人不早伐其謀恐又費一番剪除也秦凱
在卽仍屯一卮以勞從者不知肯一紆左否

又

適聞捷音屣齒欲折軍威大振妖氛立清數萬生靈實惟台
臺留之然四處奸黨實煩有徒徘徊觀望在此一舉今而後
膽自寒謀自消震懼不敢復逞矣彌腹心之患貽宗社之福
此其功豈淺淺耶但巢穴雖空結聯實廣滋蔓難盡反側勇

生旌旄商播之後再留一軍彈壓羣時似亦勢不容已耳如
以鄒滕久罹湯火士庶望切霓雲則請轉為奏記于撫臺公
祖發卒來成非特勞善後之策亦所以竟無前之烈也憑楮
無任瞻馳

與李性叅

昨讀鄒遊翁極有此興奈病體支離動需人扶殊恨濟勝無
與若不時見訪猶能偃仰相對作半晌劇談耳

又

今日奉邀其說亦有五洗湖一也看殘荷二也飯後靜坐三也賞羊頭雨四也酒場納款五也初意園中竟日頃羅君在齋中共談午膳出郊未遲耳

又

昨晚忽作嘔苦幾欲死一月靜功效因如此因思病魔侮人苦相侵凌不得已勉苦吟以勝之呻吟中成得一詩猶不脫本家腔調也

復管聊卿

別來數月殊切懷思前以長卿所迓聊作一札原知無及豈意門下記存不忘耶至勞金老之用情無已千祈致謝并為道不得已初意也聞二碑竣事約在重陽插萸泛菊可以共賞但不佞日苦病魔肌骨漸削尚待晤言起茲沉疴耳秋風漸深惟順時善攝為囑

與李赤城

惟老長官冰壺炳照玉尺為衡人倫之鑒久為所欽仰矣日膺新命領袖冰廳以出夾袋所儲拔幽振滯獎恬抑競培植

清倫以翼持泰道非異人事也今離照當空乾綱獨運而諸
有位多名實不孚終始易斲每以啟上疑而致中格揆厥所
繇亦吾衙門之耻也博採獨持歸于公虛務令德位相配人
地相稱亦何必借異代而嘆乏材乎惟老長官熱腸正骨靜
觀深而坐照朗自能闢彙征之途收連茹之效縉紳彈冠有
以也弟夙附同心聞命色喜先國家而後及私真有萬倍恒
情者一芹中賀伏冀鑒涵臨啟可勝馳依

復顧濟守

燕齊接壤聲跡易通備聞臺下以霜雪之心溥爲雨露十八
城吏民畏而懷之如暑月含冰寒年挾纊也濯濯治績神爵
五鳳豈能擅美于前哉某家德水之滌猗異愛屢爲坻耳熟
神明之頌與被河潤者同其沾濡仰光覲德躍躍神往非朝
伊夕矣接書開函受冊讀之令我十五年前心事爲之一快
民難見德只在中蔽上下關通無憂不治異日者填撫一方
以此道行之有餘也

與友

弟之受螫此君雖爲綱常中其隱病而道破欵局飲恨甚深
借此發機然楚事畢竟何如勦之難施則因撫之失勢由今
追昔言不幸而中矣看來決裂即在目前輔臣當揆便可乘
機談言微申矣預策敢言中窾先幾似可無罪天下事非無
先識之患正是任怨冒忌報主爲難使公道不昭何以勸天
下之破私交報君國者哉造膝而語殊可動人以台意質之
以爲然否

與鮮石帆

猥以拙慙不合時宜數年喘喘日在人刀組間久已束躬待
罪今幸公道昭明之日免于網羅可以安于耕鑿但家園蕩
燼骨肉摧殘羈棲他鄉欲歸無計萍踪浪跡不知終所稅駕
耳茲聞駕返里門謹此恭候起居伏惟良食自愛以需環召
臨啟惟切瞻佇

與鄭元岳

次尾伯宗時在邇從深慶淵源有自吾道不孤近來朝政改
觀保泰爲亟彩鷁過江上當有商畧筆間不能盡覩縷也日

偶鄴仙相邀晤之京口裁報稽遲伏惟灼亮不戢

與陳岵月

再披手教及疏抄兄鴻功偉伐久已入帝鑑中也忌者阻抑
掩蔽公道而今安在哉弟自放廢以來誓不遺長安之使苟
有可效如羽之言非所靳也然亦何足爲鼎呂重耶

與錢牧齋

口有一函託便寄訊種種心言可鑒之形迹外也茲卜兄子
寧從崇川過江道經虞山未有過而不識牧齋先生者索弟
一言先容知當不拒門屏也卜兄吳門高士摘詞染翰擅絕
一時而風流譚笑足令平子絕倒然其胸中纏纏却自坦易
城府不設可與久交者向在涿鹿壑中遣子弟受經鹿庵與
締金蘭至契每書輒稱許不置弟近與往還信其言不謬想
翁久之亦當信弟言耳

與友

自老先生之由秉銓而當揆也敦素絲之節佐更絃之治使
中外凜凜轉念戢志以奉條章主權以尊國威斯張維國有

人益不其大哉而復苦心調劑隱護善類此其功在不見不聞之地仍留一二老成以衛社稷此又天下不及盡知而某私心自亮者也自顧越在放廢澤畔行吟不敢以姓名上通長安屏退之分固應爾爾且聞龍門日峻辱在知契誼當相體卽託庇實宏而門外自遠曾言此意于程長孺想當灼察不以爲訝也正在沉病就醫京口槩行謝客無所見聞忽傳恠事令人愕然就中委曲不得而悉惟當寇亂內訌患切剝膚之時而擎天之柱濟川之楫不以支危履而度驚濤天下安知所屆耶特遣急足恭行問訊今而後乃敢仰紙布悃勞苦如常以少贖從前疎節之誓惟汪度其鑒之是荷

與孫魯山

前聞將借重憲席爲之私喜未幾廻翔棘寺黃孫不由大拜乎如翁鼎望淵猷築沙堤以待此海內之所具瞻而同心尤切切者耳比來聖治日新美政不可勝紀傳之青史以爲美談中間惟大君子贊襄其造福宗社何有極也而同人之頌義又不足言矣但返正可喜保泰爲艱此後惟使君子之氣

常伸小人無隙以乘斯勢常居其勝而永無後患矣治抱病
既久已成沉痾而目疾歷有半歲五色不辨竟成廢人萬萬
不能任天下事矣老父母日切存注引掖甚殷但此病狀斷
非春明物料若勢難久置高閣惟宜養病白門清要之地斷
不敢居即將作簿書亦所不避也願求降格以遂遐志知我
亦可少亮此苦懷矣特此奉復并布腹心希惟炤原不一

與友

自六月一書奉問菴間忽又秋中矣計新糧艘將抵通灣漕
事業有成勞之以告于天子矣此來聖德日新徽美不可殫
述而在太傅大拜以後輔臣以輔養君德為主相業之光遂
覺燦炳青史而最快人意者朝端穢穢劃然一洗初出茅廬
之功于此爲大凍南諸君子無不交口稱誦而我輩舟中語
自後先見矣但秉鉞之人猶虛張捷書掩敗冒功以啗振旅
還朝計其歸袞此人豈復肯在人下也爲社稷計不得不蚤
防之別後之機此其轉關一番利導萬代瞻仰實在此舉祖
臺當用力夾持之毋忽可乎

與周

不佞以孔李之緣兼聲氣之雅精神照暎非一朝夕頃者石
 城得奉周旋仰見至意惓惓其所以為君國友朋者關切殷
 至令人感服不能已已頃見復社一案已入宸鑑從前惴惴
 焚坑可免此禍世道入于昌明吾輩可一意肆力學問矣再
 得聖心立轉五溪窺迹立召綸扉則尤熙朝快舉幾幾望之
 耳爨仲還里宜促叱馭過丹陽道上幸命一价相聞恐有心
 語布棕也扇頭詩悲壯何減少陵若其關係非詩人所敢望
 矣咨另勉和先此勸復不一

與李赤城

昨者一介未荷汪涵方深愧慙聞彩鷁北發又以久抱沉疴
 奄伏床褥未能強起而受教益亦何以為情也今日清議一
 線未始不昭明于士大夫間而宸衷淵微又別有主此銓地
 之所以難也老長官重望為中外所倚入都之時暫且靜以
 觀變就中默默調護善類用得一人國家即得一人之用耳
 此間委折穎楮難悉而止以二監為祟致阻躬承柰之何哉

緣三載行間心血已耗又逢大戚神傷骨瘁見者驚爲異物
中心惴惴常恐旦夕溘先朝露一切世想灰冷盡矣一丘一
壑恰爲相宜已作終焉之計若云生平未有顯過難以終廢
高閣亦惟投閒置散庶足補剝息朋白門一席則愛我者之
所以成我也都中貴游多有知之者或意狼狽未必爾爾故
特布私懷于知己之前也

與張諱春公郎

不佞棲羈貧病况味無聊日惟息心禪定不敢一問戶外久
缺聞問非以疎節自甘也漳浦來南啟關往晤每與抵掌
事不禁嘻吁聖主當陽而中外多故疆域日削揆厥所由惟
是功罪未明以致衆人抑憤卽如尊大人文武壯猷力捍危
邊所轄未失一城徒以僉壬下石遂致覆盆營門殞星人心
痛悼使當日奸人不撓其成乘勢直搗而左牽右制豈至深
入無忌乃所謀不就至令長驅千里如入無人今更蠶食數
城連陷明是議撫爲祟覆轍相尋追維前後徒有涕泗拊膺
而已邇者離照當空陰霾迅掃堯舜初心昭然布于天下連

茅彙征弓旌四出如老世翁忠孝天植當速荷環以領袖諸
賢天步多艱正需有心人共畚耜定霖雨舟楫豈異人任者
而容命世竒材久伏林泉乎緇衣有懷推轂愨後如羽之言
無足爲大賢重然不敢愛綿薄也令弟英姿粹抱聯飛指日
晤接開橋梓花萼英采儼然特告當事以効掄揚矣感承惠
問附以一芹申意臨楫不勝馳越

與李性叅

南北遙隔信使爲艱歲裏人來知將借重京兆何又不屑就
耶或以資勞深崇不欲復以簿書相煩少卽曳履經躋卿貳
耶第久別家園已及八載今春因道路少通將爲省墓之行
已理柩矣而宿春不備躊躇而止廻首北望中夜泣零乃流
寇之禍方來未已瞻烏爰止隕泪傷心所幸聖政日新百度
改觀妙有感通是可萬年耳羈人遠懷稍釋杞人憂天之思
每有胤絕盛卉之懼計惟長伴野老詠歌聖化斷難馳驅戎
旃鷁序此等苦情見人幸一宣布某今老矣雖有報國之忠
而無救時之具卽欲勉強支持而不能者耳每有書問輒復

刺刺及此語殊足自歎然骨肉之間不敢不以腹心披露也

寄黃石齋

翁兄去後時事不可言矣今日既非前日恐明年又非復今年此堂非燕雀可處急欲首歸柰滿朝皆互鄉人主上孤立無依不忍恻然去國明知伴食無補然恐一旦有事求一伴食者亦不可得耳言之潸然

與蔡

日者得觀勇略不羣私心甚重之今登鎮特借乘麾海上其十城矣當此專閩初開應須廣咨材雋某者胞藏黃石才利青萍平居志切請纓臨陣歆堪借箸希行該府取之軍前効用自可得其一臂也

復鹽山令張

不佞三年在疚無日不病今雖離閔而沉痾削骨未能一時遽起且支離日甚見者驚非故吾世即未忘我我已忘世但得少延殘喘長守先人墳墓足矣此外有他想乎惟是老父母清風惠澤神慈交譽誼當盡緇衣之好以荅覆露之私乃

承惠問拜命之餘附以一絲見意希惟茹涵爲荷

與甥王申之 南京寄札

自從賢甥同汝母親北行中心牽掛日夜不寧十四日聞仙遊之信痛徹心肝暈絕仆地三十八年手足雁行一旦分張又在異鄉痛哉痛哉何能自己念賢甥至性過人必當傷悲須當保重母過哭泣幾念迴環旣痛亾者又念生者不禁一夜九迴也倉卒之間棺槨衣衾不知曾備否搜括送銀止足途中之用諸所事宜有汝父親開喪舊規然亦不能全照今經殘破之後隨時斟酌只要盡情盡禮不至簡略足矣只恨我相隔甚遠不能飛去一行經紀寫至此腸寸寸斷矣途中仍自耽心再諭幾家丁防護一到家時急報我知使我稍放懷抱也

又

前自聞信之後悲痛之極如不欲生肝腸摧裂體中病甚嗣見超兒返棹心愈恠之恨之至見其疾勢沉重當是病蹟使然但彼中無人經紀我又不能奮飛心中何以自安賢甥平

日仁孝遇此大變更當節哀順變保重身體承先繼后總在
一身不可不念也且平日老成謹慎言不妄發事不妄行喪
完之後閉戶讀書簡用度省僕從可不憂貧矣方寸甚亂所
欲言者頗多一時未能上口有所問再陸續答之

又

計汝母親襄事在卽原意躬往執紼臨穴一慟比聞山東一
帶饑荒異常盜賊滿路白晝殺人再四躊躇遂不敢前念我
與女母何等兄妹手足相聯垂四十年而一旦分割何以爲
情今當長別無奈適際時艱南北阻絕一送之未能臨風灑
泪腸安得不寸寸斷也特扶病撰完誌銘星夜馳往以不悞
窀穸之期致莫另再遣人喪事匆匆勞費百端惟加意節哀
珍揖是囑臨書不勝悽愴

又

前已發誌銘去矣茲復作祭文令登輅致奠以代我柩前之
哭數行未寫萬泪齊下舉聲未號五內先摧可恨造物不仁
奪之速速而又恨時艱多難道里險阻不得卽返以盡執紼

之願念之能無痛徹心髓望甥于靈前禱祝今日遭際之苦
萬不獲已孑然一身不得不慮患之深而臨穴之慟竟未能
遂悠悠此恨何時已哉明春道路稍通盜賊少靖當于墓前
申意耳特再遣人歸致送此心神已隨之俱飛越矣節哀自
玉再申前囑餘不盡言

又

母親大事已襄逝者已安孝子之心盡矣此所惟當勤苦讀
書以作顯親揚名之事爲孝之大矣憶母親當時日盼盼成
立有如望歲今當讀禮轉盼從吉奮發用功正在此時然讀
書一事要在明師良友兩相夾持還須尋一有志朋友與之
朝夕講貫作文使其日日精進方可一飛冲天耳

又

前聞甥媳變故不勝悽痛今內外家事何人照管子女呱呱
誰爲撫視三千里外念之輒爲腸斷賢甥一人內外縈神何
以堪處也聞道路搶攘行有戒心茲特遣人哀問望吾甥加
意調捥勿損懷抱獨此一節爲諄諄致囑耳轉服歲除天運

或改凶豐治亂之數原是循環據傳北地大雪盈尺此是好
兆南中饑荒無減于北流民過江者紛紛不計其數搶奪之
風日不絕聞大亂卽在眼前一碗死水無處浸灌何所資而
戀戀久居此哉

又

自春以來道路梗塞欲遣人而不可得不意時事遂至于此
他無所繫念惟賢甥在遠迴望可勝潸然時時見之夢魂而
已再則行李數月未有所寄從來費用俱靠家橐而一日斷

絕遂致困乏且南中一時物價涌貴益覺其苦支持艱難便
欲思歸而歸又難安得有好情懷也

又 北京寄札

相別會几何時京師瘟疫盛行哭聲連屋不想有舅母之變
令人痛心總緣我運命乖寒骨肉摧殘俯仰回想能禁涕泗
傷悼乎百感交集萬念俱灰具疏請假遂欲以病本繼之疏
上不允朝上夕下聖意殷倦未敢仰負只得勉強以應上命
耳

又

經此大亂又感重症九死一生之餘百感悽然骨肉關懷而首在念者惟有賢甥豈不 亟欲一見而第炎天遠道跋涉為難萬不勞此行也我歸志已決勢難中止晤語之日不遠矣見人來訊問近狀安善不勝欣喜此時讀書作文宜極加意距科舉之期非遙且新提學眼力極高文字須要光芒方能起眼也我蒙上眷顧屢對臣贊美誼難仰負但前病之後未曾休息元氣大虛不耐煩勞性命為重故去志堅決審非

得已耳

又

日來心緒作惡難堪其苦忽接來報不覺痛殞泣盡而繼之血也姨母雖云抱病何遽一旦至此天乎骨肉有數而俱就摧殘裂膽摧臆何以堪此乎近來日日喆南止望速歸一由而竟不能待傷哉宦情益淡惟求速去為憑棺一慟耳

又

八月初九日為賢甥生辰是日舉子鏖戰風虎雲龍千載佳

會轉盼乙酉亦在不遠此際宜弩力為先資也一縑聊以見
意長安宦况清淡不能厚為愧耳

又

自遭骨肉之戚諸念俱灰日夜惟思歸計矣初一日忽奉上
傳入閣親灑宸翰極其眷注此等恩寵臣子何以仰副也惟
有盡心竭力翼戴聖明自便之圖不敢復言矣

又

綸扉特簡出自望外頂戴聖恩不敢遽爾言歸而大事不容
不舉以各處告變耳凡事仗借賢甥萬萬不勞遠來舉人素
出片刻無暇苦難形容草草布復

又 盡節遺札

日日思歸而受上特簡誼不忍辭在事不滿五十日而未勢
已傾力莫能挽惟有盡節以明一生忠孝耳為臣正道死無
所恨留此字作別身後凡事借我骨肉不淺也它無所言申
之甥

遺言

身為大臣不能殺賊雪耻死有餘恨然力竭盡節生平忠孝
自矢已盡於此期上可見太祖高皇帝成祖文皇帝而已兒
鉉緒具疏上控聖明并以遺疏附奏聊見孤臣一片忠赤耳
絕筆

坐臥小樓覺亦難耐故此决絕

後學劉恪

甥孫王作肅

全校

范文忠公初集卷之十二

終

